

պատուական ակամբք : Իսկ այլ յիշատակարանք նորին և
 ազգատոհմին իւրոյ , իւրաքանչիւրքն դրոշմեալ են 'ի
 պատշաճաւոր տեղիս 'ի տաճարի Ս . Յակոբայ : Ունէր նաև
 առանձին կալուածս 'ի Յոսպէ քաղաքի յանուն իւր , որ-
 պիսիք են , բաղանիքն և 'ի կարգս նորա կրպակք մթերա-
 նոցք , և տունք 'ի վերայ նոցա , եւ պարտեզ արտաքոյ
 քաղաքին , և կարգեալ էր 'ի վերայ նոցա յատուկ վերա-
 տեսուչ , եւ 'ի ձեռն նորին կառավարեալ իւրաքանչիւր
 ամի զհաշիւն արդեանց և ծախուց նոցին առնոյր : Այլ
 զինի ժամանակաց՝ նոյն իսկ 'ի կենդանութեան նորին
 Սեղբոսի , յարեան ումանք յայլազգեաց՝ իբր ժառանգ կա-
 լուածոց , և բռնացեալ 'ի վերայ նոցա յափշտակեցին զայնս :
 Թէպէտ ինքն Սեղբոս բազում անգամ 'ի դատ եմուտ ընդ
 նոսա 'ի դատարանս Կոստանդինուպօլսի և յայտնի եցոյց
 զիրաւունս իւր՝ և զանտեղի վէճս և զբռնութիւնս այլազ-
 գեաց՝ որպէս յայտ առնեն բազմաթիւ դատաստանական
 գրեանք և Արքունի հրովարտակք , որք ցարդ պահին 'ի
 Ս . Աթոռն , սակայն չեղեւ հնար թափել զնոսա 'ի ձեռաց
 նոցին , զի տիրեցին և տիրեն մինչեւ ցայսօր ժամանակի .
 զի դժուարութիւնք ժամանակին և հեռաւորութիւն տե-
 ղոյն՝ ոչ ինչ օգնեցին ջանից և դատաստանաց Ամիրային :

Իսկ ինքն Սեղբոս Ամիրայ՝ կացեալ ժամանակս ինչ յե-
 րուսաղէմ , արարեալ անդ զմեծամեծ բարեգործութիւնս ,
 և կատարեալ զուխտս իւր , դարձաւ 'ի Կոստանդինուպօ-
 լիս : Գրիգոր Պատրիարք ջանիւք եւ աշխատութեամբ ա-
 ւարտեաց զնորոգութիւն տաճարին Ս . Յակոբայ յուրա-
 խութիւն սրտի իւրոյ : Այլ հոգ մեծ էր նմա վասն սուրբ
 Փրկչի վանաց , զի այլազգիք Սիոնի նեղէին եւ տագնա-
 պէին հանապազ զմիաբանսն վասն ջրոյ : Զի թէպէտ նոքա
 ունէին զմեծամեծ ջրհորս 'ի վանքն Սիոնի , այլ առ չա-
 րութեան սրտի իւրեանց՝ հակառակութեամբ առանց ժա-
 մու և ժամանակի , և երբեմն 'ի գիշերի եւս եկեալ բաղ-
 խէին զգուռն , և ստիպէին բանալ զայն և ընուլ զսափորն .
 և յոչ առնուլ յանձն միաբանաց՝ զայրացեալ թշնամանէին
 զնոսա սոսկալի հայհոյութեամբ և լուտանօք , և ձգէին
 զմեծամեծ քարինս 'ի ներքս , և չհանդուրժեալ միաբանաց
 այսպիսի յանդգնութեան նոցին , յակամայից բացեալ տա-